

存復齋文集

新編書目

存復齋文集卷之六

元征東儒學提舉睢水朱德潤澤民著

曾孫夏重編

賜進士湖廣按察使東吳項璫彥輝校正

譜傳

朱氏族譜傳序

昔周封曹末於邾子孫去邑以朱為氏歷世既久源
長派別支為百宗不可殫尋其緒惟吾朱氏世系睢
陽宋朝議大夫兵部郎中贈司農少卿德潤九世祖
也初遠祖仁軌在唐咸亨中隱居于亳從祖敬則累
官至正諫大夫兼脩國史至十世祖漢賓事梁太祖

歷滋滑宋亳曹五州刺史贈太子少傅謚貞惠五季
艱難徙居睢陽宋景祐中九世祖貫積官至右司諫
進兵部郎中致仕偕杜祁公燕申睢陽為五老會宋
人圖之七世祖喬年以國子監直講進郊社令六世
祖椿年入金為國子校勘轉太常丞五世祖源潛隱
弗仕時金泰和中淮蔡擾攘四世祖直閣公子榮南
奔渡江年甫六歲初抵瓜步津舟人需渡錢無有因
為竹篙挂墮江津俄而舟過丹陽公亦登焉舟人驚
訝問所以得渡公曰附舟拖來矣衆咸歎異同渡僧
允謙因携以詣吳郡守賈青青故慶曆相賈魏公之
孫也實與朱氏世契乃俾托居於史元長家及長好

讀書貧無以養時販繒自給寶慶初為江州文學仕
止朝奉郎直祕閣此朱氏渡南之始傳也再傳而曾
祖大有仕止實錄院脩撰三傳而祖應得仕止太學
正四傳而至考瓊國朝初授無錫縣學教諭又調長
洲學諭即謂人曰吾家世儒冠自前代以來俱稱清
白今為學職而祿簿不贍豈將取諸人乎遂隱居教
授不出專經之暇至遺文小史陰陽卜筮之書靡不
周覽元統中卒於家至德潤凡五傳焉嗚呼禮以大
宗小宗之別著為大令而族屬之三從再從同堂者
則又盡於總麻然則大宗之家雖五世絕族者亦為
之齊衰三月則始祖者雖百世祀可也若夫歲月之

悠久土地之遐隔仕止之異涂繆迷其宗族者有矣
今則以其在譜者緒其傳有銘誌者記其行事述為
小傳自少卿而下凡八人使吾朱氏之子若孫閱譜
而得其傳閱傳而知其行事庶乎歲久之不忘而或
有能聞風而作興者則亦朱氏之有人焉泰定元年
歲甲子正月初七日曾孫朱德潤序

東陽柳貫填諱

高祖諱貫字貫道世本亳人五季徙家遂為睢陽人
少警敏嘗讀書一覽輒不忘明道中登進士第積官
至右司諫進兵部郎中治平中贈司農少卿公博學
有識度常上書言治道謂賢愚不當並處若賢者在

位則小人化為君子如蓬生麻中不扶自直上嘉
納之又言方今四方粗安然非謂太平也何則北有
強鄰西有叛虜數擾內地兵疲于外民竭於內而廷
臣晏然自以為太平往年西師大舉州郡虛耗設有
乘弊而起雖善治者不能料其後也況秉樞之臣與
戚里同事忠勇之臣不得盡力邊隅此陛下所宜深
慮而明斷也上獎諭之擢右司諫慶曆中將大用為
言者忌遂以兵部郎中致仕退居睢陽偕祁國公杜
衍司農卿畢世長禮部侍郎王渙駕部馮平為五老
會宋人形於繪事歐陽公為之賦詩皇祐中卒年八
十九子喬年

八世祖喬年字公壽以蔭補為太廟齋郎少英爽自負數上書言事為國子監直講以母憂結庐睢水村躬耕五年俸餉骨立再起為郊社令卒年五十六子椿年

七世祖椿年字崧之金天德中海陵王南征盡有淮蔡之地大定中公以選試經義中格授國子校勘文字三年轉太常寺檢討因議封事不合乞歸田里十年將有事南郊起復為太常丞上所撰郊祀禮書其略曰人主事天所以崇報本也若幣帛犧牲儀衛音樂過奢則煩民而瀆神所費甚廣矣古者掃地而祭蒲葦采越席陶器粢尊而能格神祈天者以盡誠敬故

也後世禮文滋多而誠敬甚闕蓋非報本之義也世宗納之尋轉掌國史判院事卒年七十三子源

六世祖源字昌本介潔不群嘗閉戶讀書數月不交人事出謂人曰吾所慕者古賢人事何暇與若輩言稍出復閉戶如初然少嬰疾金承安中卒年三十五子子榮

五世祖子榮字公顯晚號信庵少機警對人似不能言金泰和中淮蔡擾攘公年甫六歲從居人南奔至揚子西津舟人需渡金無有因為竹篙拄墮江津俄而舟抵丹陽公躍而登焉舟人驚訝問得渡意公徐曰附施來矣众皆嗟異同渡僧允謙奇之携詣吳郡

守賈青得寄育于史元長家及長好讀書貧無以為
養時販繒自給寶慶初詣行在所上書言時政授從
政郎江州文學又言方今邊隅之臣常受制於總領
官或不諳軍旅者經畫之際輒成齟齬自今已後朝
官雖帶總領亦須諳練軍事庶幾調度合宜况邊庭
之上民情未決險阻未知而輒易守臣此皆措置失
宜也書再上時相難之不報三年轉左藏提轄進直
祕閣咸淳中因論事忤賈似道送大理寺問得祕書
家鉉翁力辨免然猶以歸正人安置淮西至元十三
年江南歸附公歸卒於吳年八十三子大有
曾祖大有字應之性嚴毅雖盛暑冠帶不褫景定中

游藝鄉校赴部用黃甲免試授太學錄上書言方今
川口襄陽淮陽三鎮糧草不繼而兵多疲弱宜遣沿
邊州郡遞送糧草使持重之人深溝高壘收丁壯為
守禦計設有北軍至堅壁不動則遠來之众前進則
有後顧之慮退保則不能久勢自解矣書上賈似道
以為切已不報既而似道謂曰汝賈門壻也何言事
若此公荅曰某故賈魏公昌朝孫壻也由是似道益
銜之竟誣以事籍其家送大理寺問得秘書家鉉翁
力為之辨遂以歸正人安置淮西至元十三年王師
駐維陽公即着青衫乘白馬徑詣軍前伯顏丞相以
為宋探馬俾引至前公具言似道誤國失信被害忠

良故某得至此時平章尤公亦在因曰朱某字名士
遂堅欲爵之公辭以仕官非所願但得正名義歸田
廬足矣南服既定丞相以尤平章至吳城凡宋所籍
朱某家產悉還之由是頗營業為隱居計晚愛內典
與阮登炳何處尹等結華嚴會大德三年冬忽說梵
網曰予其逝矣熏沐危坐中宵合掌脫去年七十七
子應得

祖應得字仁仲聰敏有材幹事親至孝定省之暇議
論古今父子自為知己咸淳庚午以上舍生會試授
祕書省檢閱文字再授太學正以父言三鎮事忤賈
似道安置淮西至元十三年江南歸附後復吳中隱

居儒司以學校廢薦起提調學事改營廟學祀孔子
使精游歌詩經邑子偉之學既成即復歸隱或勸之
注曰燭之寶巴之聲中年之芻遇未遇彼何心哉又
曰人生一夢水齊而汨火盡而傳天得也大德五年
卒年五十四子瓊

老瓊字廷玉樵枵中隨公祖聞關淮楚得復歸吳年
二十五儒司薦為無錫縣學教諭又調長洲學諭歲
餘謂人曰今世仕祿不足養廉將學而取諸人乎抑
自營以資其生乎遂閉門與諸生講授三十年不出
城府專經之暇至百家子史陰陽卜筮之書靡不周
覽聞人有能學如不及窮老益堅至弗遑暇食遂與

世事日薄一室罄然陶器琴書外無長物歲久人持
去而不較性疎坦每游林泉佳處遇樵人牧子即與
忘情談笑終日清貧晏如也三山劉宗師贈號明復
先生晚究易傳作先天後天八卦互屬之圖明動靜
隱顯屈伸之理占歲時豐荒雨暘祥禳悉有徵驗至
順元年歲庚午秋積雨後屋岬崩忽謂德潤曰明年
歲在辛未幹金支火火弗勝水民其災乎然吾大限
亦與歲君併吾其弗支矣曰來儆汝高林博孝身之
勞也令聞廣譽忌之招也謙之彖曰人道惡盈而好
謙節之彖曰節以制度不傷財不害民凡人欲之過
者本於奉養之厚也先王制其本以節之復天理也

然久於其道者其惟恒乎以之脩身其惟復乎汝其
誌之吾家世儒冠先世渡江以來遭家多故不絕如
綫百年丘隴汝其保之汝毋兆在坐甲向庚前望有
水在艮之坤有剝復之象焉順而止之所以觀象七
日来復利有攸往若順而守之其有復興者乎但隴
抱陰防陰險忌然吾擇之審矣宜弗踰此噫造物者
生我我亦與造物游耳葬祭之禮汝其勤之德潤泣
拜曰敢不惟大人之言是聽至冬得寒疾明年春正
月卒年五十八

趙承旨跋睢陽五老圖

五老遺象儀刑儼然觀之使人肅然起敬朱氏子孫

而能保之真盛事也吳興趙孟頫書

虞伯生學士跋

歐陽公次韻謝借觀五老詩云脫遺軒冕就安閒笑傲丘園綠倒冠白髮憂民雖種種丹心許國尚桓桓鴻冥得路高難慕松老無風韻自寒聞說優游多唱和新篇何惜畫圖看當時君子其敬愛想慕固已如此况二百數十年之後併得瞻拜五公遺象於一日豈勝幸願乎想見其高節盛德叅合於治安極盛之日三代之下不亦鮮乎卷尾諸公所跋皆南渡名卿賢大夫觀其書而思其人則有感慨係之者矣按跋語淳熙以前在畢氏紹熙以來在朱氏今幾二百年

仍於朱氏之曾孫德潤見之信乎有德者必有後也
歟秦定乙丑十月一日蜀郡虞集書

汶上曹元用馬祖常拜手敬觀

廣平程鉅夫拜觀

姚燧馬煦元明善

致和改元八月晦河東劉致天台周仁榮宛
平曹鑑蟲吾鄧巨川同觀于吳福孫樂善齋
水襟夕之謹識

天曆己巳清明日濟南韓鏞題于弼教堂
至順三年四月十二日宛丘趙期頤拜觀
至元六年後庚辰歲西夏韓玉倫徒拜觀